

Immer schee in de Schadde stelle losse

Als ich om vergangene Freidaach uffem Markt war unn Salat un Gemies oikaaft habb, bin ich uffem Weech zum Audo fast iwver de Karl gestolwert. Der hott uff de Hauptstrooß vorm Scharfe Eck gestonne unn hott de Leit zugeguckt.

Ei gude Karl, habb ich enn begrießt, was stehsden hier erumm, wo iss dann die Paula?

Ei gude, hott de Karl zur Antwort gewwe, ei die Paula iss noch uffem Markt, hosde se nit geseh?

Naa, habb ich gesacht, awwer ich war aach nor om ersde Stond, doo war se nit.

De Karl zuckt die Achsele: Mooch soi dasse jemonnd getroffe hott unn noch e bisje babbelt. Dann konns long werrn.

Wie gehders dann, Karl, habb ich gefroocht, du haddst doch Oofong de Woch de Husde unn de Schnubbe?

No ja, sacht de Karl, ess iss e bisje besser, unn hott gegauzt wie enn Lungekronke.

Ich schnappen om Arm: Unn warum stellsde dich dann hier in de Schadde? Komm, mir gehn in die Sunn, dess iss besser ferr dich unn doin Husde.

Gut Idee, hott de Karl genickt, gehn merr uff die onner Seit. Obwohl die Paula merr gesacht hott dass ich hier wardde soll bisse widder kimmt, sunnst misstse mich widder suche wies letzte Mol. Awwer die werrd mich schunn finne.

Ei ja, habb ich gemoont, von dort driwwe sehn merr doch aach wenn se kimmt.

Also sinn mir zwaa iwver die Strooß gonge unn hawwe uns beim Musikhaus in die Sunn gestellt. Bass owacht, hott de Karl gesacht, wenn die jetz um die Eck kimmt unn sieht mich nit, dann werdse gleich widder knoddern: Konnsde nit uff oom Fleck stehe bleiwe? - immer muss ich dich suche!

Wie war dann dess, habb ich de Karl gefroocht, wiese dichs letzte Mol gesucht hott?

De Karl grinst: Wie se nit ebeikumme iss, weil se widder mol so long geschwätzt hott, bin ich oofach fort unn bin ins Joffche, ooner drinke. Unn dann warns vier unn als ich hoom kumme bin, hottse e Schnut gemacht unn geschennt, weil ich noch nit emol drei Minutte wadde kennt, wenn se mol e paar Wort mett jemonnd babbele det. Drei Minutte! – e halb Stund hadd ich gewart!

Mir hawwe noch e bisje gebabbelt unn e Verdelstund später hawwe merr die Paula geseh mettere Dutt in de Hond, awwer weil grad drei Audos vorm Fußgängeriwverweech halde mussde, konnte merr ihr nit rufe. Unn was hottse gemacht? Sie iss beim Scharfe Eck

um die Eck, guckt, sieht ihn Karl nit, zieht e Flunsch unn is gleich zwische de Audos dorch unn wollt die Fleschgass enuff, wahrscheinlich gleich ins Joffche.

Hallo Paula, hawwe merr gerufe, hier sinn merr.

Die Paula guckt, kimmt uff uns zu, schnappt ihn Karl om Ärmel unn ziehden fort. Nodierlich du, Honnes!, war dess oonziche, wasse gezischt hott.

Awwer de Karl hott sich grad nochemol losgerisse unn hott merr zugeflistert: Jetz lässt se dehoom widder die Kadoffele oobrenne. Merk derrs: Immer schee in de Schadde stelle losse, dann hosde doi Ruh.

Eiern Honnes